

- मुख्यमंत्री भजन लाल शर्मा कह्या-सरकार लारला एक बरस मांय महिलावां, मोट्यारा, काश्तकारां अर मजूरा रा समेत न्यारा-न्यारा वर्गा ने संबल देबा रो काम कर्यो है।
- राज्य सरकार रा कार्यकाल रो एक बरस पूरो होबा माथे प्रदेशभर मांय अन्त्योदय सेवा शिविरां समेत केई कार्यक्रम राख्या गया।
- राज्य मांय पैली बगत हेलीकॉप्टर रे जरिये मानव अंगां रो परिवहन- जयपुर अर जोधपुर मांय प्रत्यारोपण कर्यो जा रह्यो है।
- प्रदेश मांय केई ठौड़ां माथे शीतलहर रो दौर जारी-फतेहपुर मांय पारो लगातार पांचवां दिन माइनस मांय दर्ज।

000

मुख्यमंत्री भजन लाल शर्मा कह्या के सरकार लारला एक बरस मांय महिलावां, मोट्यारा, काश्तकारां अर मजूरा समेत न्यारा-न्यारा वर्गा ने सम्बल देबा रो काम कर्यो है। आज राज्य सरकार रा कार्यकाल रो एक बरस पूरो व्हे ग्यो है। इण मौके मुख्य केई कार्यक्रमां मांय सिरकत करी। श्री शर्मा अब सूं कुछ देर पैली जयपुर री पिंजरापोल गौशाला मांय अंत्योदय सेवा शिविर री सुरूआत करी। मुख्यमंत्री कह्या के अन्त्योदय सेवा शिविर गरीबा अर वंचिता रा उत्थान खातर है।

इण मौके मुख्यमंत्री 2 हजार दिव्यांगां ने स्कूटी अर 10 हजार विशेष योग्यजन ने कृत्रिम अंग अर उपकरण बाट्या। इण मौके श्री शर्मा दुर्लभ बीमारियों से पीडित टाबरा खातर मुख्यमंत्री आयुष्मान बाल संबल योजना अर 'मुख्यमंत्री स्वनिधि योजना' री शुरुआत भी करी। राज्य स्तरीय कार्यक्रम मांय मुख्यमंत्री विश्वकर्मा पेंशन योजना अर मुख्यमंत्री सद्भावना केन्द्र री भी लॉचिंग करी। प्रदेश रा न्यरा-न्यारा जिला मांय अन्त्योदय सेवा शिविर राख्या गया। इण सूं पैली मुख्यमंत्री आज जयपुर रा जवाहर कला केन्द्र मांय सरकार रा एक बरस रा कार्यकाल ने समर्पित राज्य स्तरीय प्रदर्शनी रो उद्घाटन कर्या। इण मांय राज्य सरकार रा एक बरस रा कामकाज अर उपलब्धियां ने दर्शाया ग्यो। वठिने मुख्यमंत्री अमर जवान ज्योति माथे राख्या कार्यक्रम मांय पुलिस महकमां री केई गाड़िया ने हरी झंडी दिखा र रवाना कर्या। मुख्यमंत्री एस.एम.एस. सूं 101 एडवांस लाइफ सपोर्ट एम्बुलेंस, 25 पुलिस पेट्रोलिंग गाड़ियां अर 22 पुलिस इंटरसेप्टर गाड़ियां ने रवाना कर्या। इण दौरान वणा कालिका पेट्रोलिंग यूनिट री शुरुआत करी। इण सूं पैली मुख्यमंत्री आज सुवांरे डीग जिला रा पूछरी रा लौठा मांय न्यारा-न्यारा विकास कामां री नीव राखी। वे कह्या के गिराज जी री परिक्रमा खातर देशभर सूं बड़ी संख्या मांय सिरधालू आवे है। वां री सुविधा खातर राजस्थान री सीमा मांय आवा वाळां रास्ता ने विकसित कर्यो जावेला।

गिराज जी रा परिक्रमां मार्ग ने विकसित करबा खातर वेदान्ता समूह कानी ऊं 100 करोड़ रुपया री इमदाद दी जावेला।

000

प्रदेश सरकार रा कार्यकाल री पैली वर्षगांठ माथे बीकानेर अर भरतपुर विकास प्राधिकरण रा गठन ने ले र अधिसूचना जारी व्ही। मुख्यमंत्री इण बाबत पैली ऐलाण कर्यो हो। दोन्यू शहरां मांय इण प्राधिकारणां रो गठन होबां सूं आरो सुनियोजित विकास व्हे सकेला।

000

मुख्यमंत्री भजनलाल शर्मा रो आज जन्मदिन है। इण मौके दौसा, झुंझुनू समेत केई ज़िला मांय रक्तदान अर गौ-सेवा जेड़ा कार्यक्रम राख्या गया। प्रधानमंत्री नरेन्द्र मोदी श्री शर्मा ने वां रा जन्म दिन रे मौके शुभकामनाएं दी। आप रा संदेश मांय श्री मोदी कह्या के जमीनी स्तर माथे काम करबा रो श्री शर्मा रो लम्बो अनुभव राजस्थान रा चौतरफा विकास मांय महती भूमिका निभावेला। राज्यपाल हरिभाऊ बागडे भी आप रा संदेश मांय बधाई देता थकां मुख्यमंत्री रा स्वस्थ, लम्बी उम्र अर मंगलमय जीवन री कामना करी।

000

उप मुख्यमंत्री दिया कुमारी आज पाली ज़िला रा दौरा माथे री। इण दौरान वणा 8 दिसम्बर ने व्ह्या हादसा री ठोर देसूरी री नाल अर देसूरी घाट सेक्शन रो जायजो कर्यो। उपमुख्यमंत्री अठे रा खतरनाक मोड़ अर सकड़ी सड़का ने देख र संबंधित महकमां ने तुरत सुरक्षा उपाय पक्का करबा रा निर्देश दिया। खबरनवीसां सूं बातचीत करता थकां वे कह्या के सुधारात्मक उपायां सूं इण रास्ता माथे होबा वाळी दुर्घटनावां माथे लगाम लागे ला।

.....
बतायो जावे है के देसूरी री नाल अरावली पर्वत माला रे बीच सूं गुजरे है। जो आप री प्राकृतिक सुन्दरता रे सागे खतरनाक ढलान अर आड़ा तिरछा मोड़ खातर जाणी जावे है।

000

केंद्रीय संस्कृति अर पर्यटन मंत्री गजेंद्र सिंह शेखावत वन नेशन-वन इलेक्शन ने देश खातर जरूरी बतायो। आज जोधपुर मांय श्री शेखावत खबरनवीसां सूं बातचीत करता थकां वन नेशन-वन इलेक्शन माथे विपक्ष रा विरोध ने ले र कह्या के हाल ताई कोई भी इण बाबत तीखी प्रतिक्रिया नी दी है। हाल यो प्रस्ताव कैबिनेट पारित करी है। लोकसभा माय आबा माथे इण माथे चर्चा व्हेला। महिलावां रा सशक्तीकरण बाबत शेखावत कह्या के महिलावां री सुरक्षा री सुरक्षा निश्चित रूप सूं म्हे सगळां लोगां री प्राथमिकता है।

000

प्रदेश मांय पैली बगत हेलीकॉप्टर रे जरिए मानव अंग-लिवर अर किडनी आज एम्स जोधपुर लाया गया। इण कदम ने अंग प्रत्यारोपण रा हलका मांय एक बड़ी उपलब्धि मान्यो जा रह्यो है। ये अंग झालावाड़ मेडिकल कॉलेज मांय एक डोनर सूं लिया गया है जो सड़क हादसा रे पछे ब्रेनडेड व्हे ग्यो हो। इण अंगां रो प्रत्यारोपण कर्यो जा रह्यो है। हवाई रास्ता सूं आबा री वजह सूं इण अंगां री सुरक्षा अर गुणवत्ता पक्की होबा रे साथ टेम री बचत भी व्ही है।

000

झुंझुनू मांय आज राजपुताना राइफल्स री 12वीं बटालियन री कानी ऊं शौर्य दिवस मनायो गयो। इण दिन ने बटालियन इच्छामति दिवस रा रूप मांय भी मनावे है। दरअसल आज ही के दिन 15 दिसंबर 1971 ने बटालियन रा वीर जवान इच्छामति नदी ने पार करता थकां दुश्मनां माथे हमलो कर उण रा तीन ट्रेनिंग कैंप तहस-नहस करता थकां दुश्मन ने करारी मात दी। उण रे पछे सूं ही हर बरस 15 दिसंबर ने शौर्य दिवस अर इच्छामति दिवस रा रूप मांय मनायो जावे है। झुंझुनू मांय व्ह्या इण कार्यक्रम मांय राजस्थान रे अलावा उत्तर प्रदेश, मध्यप्रदेश, पंजाब, हरियाणा अर दिल्ली समेत दूजा राज्या सूं भी पैली रा सैनिक अर शहीद वीरांगनावां शामिल व्ही ज्याने सम्मानित कर्यो ग्यो। कार्यक्रम रा मुख्य अतिथि मेजर जनरल प्रभुसिंह राठौड़ हा।

000

जयपुर रा जवाहर कला केंद्र मांय चाल रह्या सरस राज सखी राष्ट्रीय मेला ने देखबा खातर बड़ी तादाद मांय लोग पूग रह्या है। राजस्थान ग्रामीण आजीविका विकास परिषद री कानी ऊं राख्यो ओ मेळो 30 दिसंबर ताई चालेला। मेळा मांय देश भर री हुनरमंद अर उद्यमी महिलावां आप रा उत्पाद रो प्रदर्शन कर री हैं। 400 स्टॉलां माथे करीब 15,000 सूं बत्ता उत्पादन बिक्री खातर मुहैया है, इण मांय 600 सूं बत्ता उत्पाद जीआई टैग वाळा है। आजीविका परिषद रा परियोजना निदेशक अजय कुमार आर्य बताया के मेळा मांय आर्गेनिक उत्पाद अर हस्त शिल्प रा केई उत्पाद भी प्रदर्शित कर्या गया है।

000

राज्य मांय बत्ती ठौड़ा माथे तापमान मांय कमी आबा सूं सर्दी रो असर बढ़ ग्यो। बत्ती ठौड़ां माथे आज रो कम ऊं कम तापमान 5 डिग्री सेल्सियस सूं नीचे दर्ज कर्यो ग्यो। मौसम महकमां रे मुजब आज सब ऊं कम माइनस 1 दशमलव 2 डिग्री सेल्सियस कम ऊं कम तापमान सीकर रा फतेहपुर मांय दर्ज कर्यो ग्यो। माउंट आबू मांय 1 दशमलव 2 डिग्री, चूरू मांय 1 दशमलव 6, भीलवाड़ा मांय 2 दशमलव 2, सीकर मांय 2 दशमलव 5, पिलानी, सिरौही, संगरिया मांय 2 दशमलव 6, चित्तौड़गढ़ अर करौली मांय 3 दशमलव 2, अलवर मांय 4, बारां मांय 4 दशमलव 5, बीकानेर मांय 4 दशमलव 8 डिग्री सेल्सियस कम ऊं कम तापमान दर्ज कर्यो ग्यो। राजधानी जयपुर मांय रात रो तापमान 7 दशमलव 8 डिग्री सेल्सियस रियो। मौसम केन्द्र जयपुर रे मुजब आवता दिना मांय मौसम सूखो रहवेला। तापमान मांय बदलाव नी होबा रा आसार है।

000

राष्ट्र, आज देश रा पैला गृहमंत्री अर लौह पुरुष सरदार वल्लभ भाई पटेल ने वां री पुण्यतिथि माथे याद कर रह्यो है। प्रधानमंत्री नरेन्द्र मोदी सरदार पटेल री पुण्यतिथि माथे वां ने श्रद्धांजलि देता थकां सोशल मीडिया पोस्ट माथे कह्या के वां रो व्यक्तित्व अर वां रा काम देश री एकता अर अखंडता अर विकसित भारत रा संकल्प ने हासिल करबा मांय देशवासियां रा प्रेरणा स्रोत बण्या रहवेला। पैली रा मुख्यमंत्री अशोक गहलोत भी सरदार पटेल ने श्रद्धांजलि दीनी।

000

देश रा सार्वजनिक हलकां रा बैंकां ने माली बरस 2023-24 मांय हाल ताई करीब एक लाख 41 हजार करोड़ रुपया रो सब ऊं बत्तो फायदो व्ह्यो। इण दौरान सकल गैर निष्पादनकारी परिसंपत्तियां रो अनुपात घट्यो है। इण बरस सितम्बर मांय यो अनुपात तीन दशमलव एक-दो फीसदी दर्ज कर्यो ग्यो। मार्च 2018 मांय यो अनुपात 14 दशमलव पांच आठ फीसदी हो। वित्त मंत्रालय रे मुजब सार्वजनिक हल्का रा बैंक शेयर धारका ने चोखो फायदो दियो है। लारला तीन बरसा रे दौरान 62 हजार करोड़ रुपयां रा लाभांश रो भुगतान कर्यो ग्यो।

000

प्रधानमंत्री नरेन्द्र मोदी 29 दिसम्बर दीतवार ने आकाशवाणी ऊं प्रसारित कर्या जावण वाळा खास कार्यक्रम 'मन की बात' मांय विचार बतावेला। आ हर महीना प्रसारित कर्या जावण वाळा ई कार्यक्रम री 117वीं कड़ी व्हेला। आप ई ई महीना री 27 तारीख ताई मुफ्त नम्बर 1800-11-7800 माथे ई कार्यक्रम सारु राय दे सको हो। ई सागे ई 1922 नम्बर माथे मिस्ट कॉल दे र एस एम एस रे ज़रिए मिल्या लिंक ऊं ई सुझाव दिया जा सके है। नरेन्द्र मोदी एप या माई जीओवी ओपन फोरम रे जरिये ई ऑनलाइन तरीका ऊं सुझाव दिया जा सके है।

000